



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

Ita ka nung Kamala Harris-i sen \$540 million bendenogo

'Kü rara tang ang tenzükogo': Vinesh Phogat

VOL. XXI ISSUE NO. 314 (ADOK 314) DIMAPUR SANGTENNÜ (TUESDAY) LUROI (AUGUST) 27, 2024 ₹ 5.00

Tanü nungi NLA session tenzüköer

Kohima, August 26, 2024 (TYO): Mongulbar nungi Nagaland Legislative Assembly monsoon session tenzüköer.

Anogo asemnü session nung Nagaland Liquor Total Prohibition Act of 1989 aser sorkar departments tongti kar indang service rule amendments dena tongtipang onük kar benoka lemsatepsü.

August 22 nü Nagaland state cabinet-i NLTP Act yanglur küm 30 tema arur anungji meyipa reprangshitsü nungdaker aser tesem kar nungibo iba Act agientsü ta jembitepa liasü aser monsoon session nung iba onük benoka lemsatepsü lemet.

Ajisüaka, sorkari NLTP Act meyipa reprangshitsü sangdongba sülen telok aikati yi tajung angutsü atema Act agientsüla ta ashir, saka külen arogotemibo Act magientsüla ta tekong meranga noktaker aser Nagaland Baptist Church Council (NBCC)-i Deobarnü arogo ajak

nung sarasademtsü ayongzüka agiogo.

Tan assembly session nung sorkari Power sector nung Communitisation Programme agientsü atema benoktsü. Communitisation Programme kübok sorkari single point metering system enok aser yimtsüng ketdangpur nem power tariff meshitsü mapa nungloksü.

Ajisüaka, power tariff bendenba nung takoksa aika anguba agi sorkari iba Act ya urban aser suburban areas nungi agientsü saka yimtsüngtem nungbo mekongshitsü lemetetogo. Asüng nungi tenzüka agiba session nung Power aser Public Health Engineering dena department tongti kar indang service rules yanglushitsü.

Session nungsa question hour, Government Bills, resolutions, laying of annual administrative reports of government departments aser assembly committee reports dena lir.

PM Modi-i US President Joe Biden den jemb



Joe Biden aser Narendra Modi (file)

New Delhi, August 26, 2024 (Agencies): Hombarnü Prime Minister Narendra Modi-i United States President Joe Biden den phone ajanga jembidang Bangladesh aser Ukraine tebilemstütem den tanga onük kar lemsatepogo.

PM Modi-i Joe Biden den jembidang Ukraine tensa dena regional aser global onüktem asoshi tebilembatem lemsatep.

PM Modi-i tawa Ukraine semdangba indang Biden dang ashi. India-i olemtep aser diplomacy atema jembia aruba ama noktaka lir aser Ukraine nung yimjung aser tensa süngjemtsü pusema nungiter ta Modi-i ashi.

"Tanü POTUS Joe Biden den phone ajanga jembidogo. Künati Ukraine tensa dena regional aser global tebilemstü balala lemsatep. India-i yimjung aser tensa süngjemtsü ashiba nung masetshii noktaka aliba nenshiogo" ta PM Modi-i metetdaksü.

PM Modi-i taoba hopta Ukraine semdangbang President Volodymyr Zelensky den ajurutep. Idangji pai Zelensky dang mapang meindoki Ukraine

asere Russia külemi mener olemtepa rara anentsüla ta ashi.

India-i yimjung bener maparen nung tongti shilem agitsü renema lir ta Modi-isa ashi.

Modi-i Biden den jembidang Bangladesh nung yimtenren mepetmesü atema tebilemstü abenba lemsatep aser tekaratiba nung tensa süngjemtsü nungdaker ta ashi.

Tenati Bangladesh nung minorities aser talisa Hindu nung kumzüka ayutsü indang jembidogo" ta PM Modi-i ashi.

Bangladesh nung Prime Minister Sheikh Hasina-i aniba Awami League sorkar atsüngdokba sülen August 8, 2024 nü interim government ka tetetogo.

Iba interim government nung arishi küm 84 tain Muhammad Yunus-i Chief Adviser (Prime Minister jenjang den kasa) inyaksü shimogo.

NDA sorkari ENPO-i akhangba mapa akümstü: BJP Nagaland



August 26, 2024 nü Nagaland BJP president Benjamin Yephthomi den Eastern Nagaland nung BJP ketdangpurtemi osangbener den jembidang agiba noksa ka angur.

Dimapur, August 26, 2024 (TYO): Eastern Nagaland People's Organisation (ENPO) indang takhangba kobi melii angateteptsü ta Bharatiya Janata Party (BJP) Nagaland-i metetdaksüogo.

Eastern Nagaland nungi BJP ketdangpurtemi den külemi BJP Nagaland president Benjamin Yephthomi-i osangbener den jembidang iba osang metetdaksü.

2010 nungi ENPO-i Nagaland nungi Frontier Nagaland Territory tentetsü takhangba agüja arur. State sorkartemi Eastern Nagaland nung terenlok magütsür aser senzüka yutsür ta aija parnoki iba ya akhanger.

ENPO kübok Eastern Nagaland nung alirtemi taküm Lok Sabha election aser urban local body election mokdanga liasü aser lungkak aitiba sentong

aika agiogo.

"BJP-i aniba NDA sorkari ENPO takhangba angateteptsü ta PM Narendra Modi aser Home Minister Amit Shah nati nangzükogo" ta Benjamin Yephthomi-i ashi.

"ENPO tebilemstü kobi melii koktettsü aser ibaji Home Minister Amit Shah lenisüba kübok dang inyaksü akok" ta pai ashi.

"ENPO-i akhangba ya kanga shitak aser mapang talangka iba takhangba agüja arur. BJP-i ENPO den külemi noktaker aser tekaratiba nung iba ken o tembangtsüla kechiyong Naga nung ajak dak kongshir" ta Yephthomi-isa ashi.

September 2, 2024 nungi Nagaland nung BJP membership drive tenzüktsüba osang paisa lemsatep.

September 1 nungi India ajungalen BJP membership tenzüktsü saka iba anogo Deobar asüba agi Nagaland nungbo September 2 nungiang tenzüktsü ta Yephthomi-i ashi.

Nübertem den ajurutepa sensaksemstü atema September 3 nungi pai state ajunga sema senzüsü aser idangji nübertem dang BJP nung adentsü ajungmesotsü ta paisa metetdaksü.

PM Modi lenisüba kübok NDA sorkari mapa inyakbate aser scheme tenzüktsü osangtem BJP-i prokshitsü ta paisa ashi.

"NDA sorkar ajanga inyaktetbatem onoki metetdaksütsü aser 2047 tashi nung Viksit Bharat atongtsü atema nübertem dang onok den adentsü jaoktsü" ta Benjamin Yephthomi-isa ashi.

Nagaland nung industry maparen renloker: Hekhani Jakhalu

Kohima, August 26, 2024 (TYO): Hombarnü Micro Small and Medium Enterprise Promotion Council of India (MSMEPCI) Nagaland chapter tenzükogo.

Tanü de Oriental Grand nung sentong ka agidang Industries & Commerce Advisor Hekani Jakhalu-i tongti tesemdang ama shilem agi.

Maneni, MSMEPCI National Chairman Pradeep Mishra Sarkar-i alakteta jaoker aser Information Technology & Communication Director Sabou Yashü o Software Technology Parks of India Additional Director Abhishek Misra nati tetushi süa jaokertem ama shilem agiogo.

"Nagaland nung industrial development ya tang tetenzüköer aser tejakleni aoba angur. 2012-13 nung 2.83% renloka liasü saka 2022-23 nungbo 12.8% tashi renlokogo" ta Advisor Jakhalu-i ashi.

"State sorkari entrepreneurs nem MSMEs pusema mapa tenzüktsü aser common facility centres 5, flatted factory complexes 5, industrial estate 1, modera aggregation centres 3, integrated warehouse 1 aser distribution centre 1 lapoktsüba

den unity mall project tenzüktsüogo" ta lai ashi.

Mongulbarnü Chief Minister Neiphiu Rio-i Ministry of MSME indang Raising and Accelerating MSME Programme tenzüktsütsü ta Jakhalu-isa ashi.

RAMP programme ajanga MSMEs tashitaitba kümdaksütsü aser teyari aika angutsü ta laisa shisem.

"Nagaland nung tang micro enterprises 25,868, small enterprises 233 aser medium enterprises 18 tashi department kübok register süa lir. RAMP programme aser iba nükjidongtem nung ajemdaker inyaka ora shishilembar dang masü saka Nagaland nung alir ajak tajangzük angutsü" ta Advisor Jakhalu-isa ashi.

Micro Small and Medium Enterprise Promotion Council of India (MSMEPCI) National Chairman Pradeep Mishra Sarkar-ia osangbener den jembidang "Council-i taküm September-October nung Retail Trading Guarantee Scheme (RTGS) aser Kisan Trading Guarantee Scheme (KTGS) tenzüktsü" ta ashi.

Item scheme ajanga timtem ajuruba shishilembar aser

aluyimertem nem senotsü teyari agütsütsü ta pai ashi.

Aluyimertem ajungkettsü atema MSME PCI-i KTGS ajanga parnok nem Minimum Support Price (MSP) rate agütsütsü. Külen RTGS ya lisopur shishilembar yarisü atema lir ta Pradeep Mishra Sarkar-isa ashi.

RTGS ya taküm September 15 nü Nagaland nung tenzüktsü ta paisa shisem.

MSME PCI-i State aser central sorkartem den külemi item scheme indang awareness programmes agitsü aser taküm October tashi nung mapa 10,000 tema adokdaksütsü merangtsü, ta Sarkar-isa metetdaksü.

Iba atema central aser state sorkartem banking sector aser department balala den mapa adoktsü atema tesentaktep yangluogo. India sorkar kübok bank 14-i MSME PCI den MoU nung sign sütepa lir" ta paisa ashi.

"Anogo 100 program nung shilem ka ama onoki sangküm tashi nung Nagaland nung mapa 25,000 shi adokdaksütsü. Nagaland renlokaksütsü atema MSME PCI-i Nagaland nem temulung agütsütsü" ta Sarkar-isa metetdaksü.



De Oriental Grand, Kohima nung Hombarnü Micro Small and Medium Enterprise Promotion Council of India (MSMEPCI) Nagaland chapter semzükba mapang tangokba noksa ka yangi angur. Iba sentong nung tongti tesemdang ama Advisor, Industries & Commerce, Nagaland, Hekani Jakhalu aser sentong akhumdong ama National Chairman, MSMEPCI, Pradeep Mishra Sarkar aser tesemdang tongti ama Additional Director Software Technology Parks of India, Abhishek Misra nungertem dena liasü.

Chümoukedima nung SBI ajanga 7th Mile Branch semzük

Dimapur, Luroi/August 26 (TYO): State Bank of India (SBI) ajanga tanü Chümoukedima nung 7th Mile Branch semzük liasü. Chümoukedima Town Council chairman, Lhousito Khro-i iba branch semzüksüngdang tanü tendak banking ya kanga tongtipang ta ashi. 7th Mile branch ya Chümoukedima nung branch ti buba lir, ta pai ashi.

Sentong nung Chief General Manager, SBI Guwahati Circle, Sahadevan Radhakrishnan-i jembidang branch tasenba ajanga nüburteterenlok asoshi shilem tongti agitettsü ta ashi. Pai bank staff tem dang tangatetba tajung nung mapa inyaksü ayongzük aser customer ajaki shilem agiba ajanga bank takok angur ta ashi. 7th Mile branch ya Nagaland nung SBI branch 73 buba alitsü.

Committee on PU-i multi-level car parking semdangtsü

Dimapur, Luroi/August 26 (TYO): Committee on Public Undertakings, Nagaland Legislative Assembly ajanga August 30, 2024 nü Old Medical Directorate nung aliba Multi-Level Car Parking aser Old NST nung aliba Multi-Level Car Parking semdangtsü, ta sangdong ka ajanga ashi.

NITI Academy Dimapur nung coaching class tenzükogo



Dimapur, Luroi/August 26 (TYO): NITI Academy, Dimapur indang IITian faculty temi AIIMS aser IITs ama linük nung reju tajungtiba nung medical aser engineering züngner atema Marwari Patti, Dimapur nung Hombarnü Biology, Physics, Chemistry & Mathematics classes tenzükogo. NITI faculties Ashwin Madhukar Nandeshwar & Yogendra Rathore (Biology), Jaydeep Pandit & Sarbikhoi Terang (Physics), Naveen Kharb (Chemistry) aser Md. Salim (Mathematics) nung ajanga ya IITians tem lir aser parnok ya Maharashtra, Madhya Pradesh, West Bengal, Assam, Haryana aser Kerala nung lir. JNU nung senior most faculty Dr. Abdul Hafeez (Biology & Organic

Chemistry) ya NITI Academy indang Academic Director aser Delhi nung lir. Iba reju nung Ajay Sethi kibur lir, aser par kibong ya küm 50 shi Dimapur nung lia arur. Sethi ya social worker aser educationist aser par tanur Er. Rishav Sethi (Software Engineer), Divya Sethi (Audiologist) & Jitesh Sethi (BS, Chemistry) nung ajanga DTU Delhi, AIISH Mysore & IIT Kanpur nung zünga Nagaland nung aliba lanurtem akokba lenmang nung shisaliok tajungtiba agütsütsü mechi NITI Academy ya lapok. NITI (Nationalist Institute of Technology & Innovation) ya LIMPL company nung shilem ka lir, koba ajanga Nagaland nung tesüiba küm 24 tashi IT education agüja arur aser yangji kaketshir

40,000 dak tema zünger parnok timba nungtugu organisations nung inyaktar aser kar pei sasa aayanga takum alir. Repeaters aser AIIMS & IITs nung Science students/ Medical & Engineering züngnertem Hombarnü nung tenzükogo Hokulbarnü (September 6, 2024) tashi anüngdang 11:00 nung nikongdang 5:00 ako tashi Free Demo classes nung adentsü pelashishia jaoker, ta Ajay Sethi, HOC, NITI Academy Dimapur ajanga sangdong ka nung ashi. Kaketshir temi pei school identity cards tem bener arutsü ayongzük aser iba sentong indang tali tejangjaba metetnera Marwari Patti Dimapur Center semdangtsü ayongzük, ta sangdong ajangasa ashi.

MOLUNGNEN O



SASHILEMLA
10.12.1955 - 21.08.2024

"Tanü onoki nü den tatembangbuba temeim salem lemsatepdang onoki na taküm alidang inyakba mapa tajungtem bilemtetter. Nai jala tajung ka, kinungtsü tajung ka, temeim tetsü ka aser kinunger ajak asoshi temeim, teyimla aser tepela agi sünga aliba rongnentsü ka ama litetogo ni. Kinunger ajaki na maliba ya azüngmeyaka bilemer aser onoki na teti menungra bilemtettsü." Shirnokisa tsürabur shiranga aliba mapang aser ano ozü den la asükhu lemsatepogo nenok sarasadem aser temeim mapa ajak asoshi kangasa pelar. Tsüngremi nenok ajak moajangma. Talisa item telok/telongjem dang pelaba metetdaksür:
1. Rionsanger Tatar Yaongyimsen
2. Kohima Yaongyimsen Senso Telongjem
3. Khensa Senso Telongjem Kohima
4. Honorable MLA Shri. Nuklutoshi
5. Perizie Colony Council
- Temiem, Kinungbo, jala, tenu nungertem aser kinunger.

Angh-i Janmashtami benjong salem aben

Kohima, Luroi/August 26 (TYO): Tanü linük tesem i sangdong nung Janmashtami ajungalen tejangraba tulu nung benjong salem lemsatepa liasü. Nagaland Angh La Ganesan-i Iba anogo tulu ajanga asen dangi temeim, tesunep aser yimchiyimjung bener arutsütsü imlar aser nisung ajak anema alitsü, tepela aser yimchiyimjunga alitsü moatsür, asoba külem-keja amunger. ta sangdong ajangasa ashi.

Dimapur nung mejangjaba nisung tasümang kanguteta lir

Dimapur, Luroi/August 26 (TYO): Traffic Control Dimapur ajanga August 25, 2024 nikongdang 2:45 ako meta telephone nungi nisung tasümang ka flyover bridge tsünglanglen lir ta osang agüja liasü. Iba osang nung ajemdaker East Police Station duty party tem iba tesem bushia ao aser non-local tebur arishi küm 55-60 shi below flyover bridge, Dimapur nung tasü mejanga aliba ngutet. Iba tasümang meita reprangba mapang tim masüba mapa inyakba kecha mongutet aser anasa alirtemi iba nisungba ya yasa-tzüra agi asüba südi ta shia liasü. Ozüng agi melaba maparen ajak renema inyakba sülen tasümang ya post-mortem examination/identification atema District Hospital morgue nung yua lir. Nisungba ya long pang sentsü tanen aser tula masem liasü. Kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok, ta Dimapur Police sangdong ka ajanga ashi.



Ungma nung Natural Park tesem nung electrical line tongtiba raksaba ajanga mapang tatsüka atema power aotsüsa akum. Iba yagi Mokokchung Town densema tesem balala nung electricity supply nung kongshir, ta Sub Divisional Officer (SDO), Mokokchung Electrical Sub-Division ajanga ashi. Iba electrical line ya August 27, 2024 nü yanglushitsü sentong lir.



August 26, 2024 nü Singapore nung India nunger Union Ministers- S. Jaishankar, Nirmala Sitharaman, Piyush Goyal aser Ashwini Vaishnaw nungeri Singapore Tir, Tharman Shanmugaratnam den senden amendang tangokba noksa nung angur.

Union Territory Of Ladakh nung district tasen 5 tentettsütsü

New Delhi, August 26 (Agencies): Hombarnü Union Home Minister, Amit Shah-i, sorkari Union territory of Ladakh nung district tasen pongu tentettsütsü atema telemtetba agiogo aser district tasen ponguji Zanskar, Drass, Sham, Nubra aser Changthang asütsü, ta metetdaksü. Amit Shah-i X ajanga, Ato kilonser Narendra Modi-i aniba sorkari Lakdakh nung nübürtem atema maongka aika yanglutsütsü asoshi inyaker, ta metetdaksü. Shah-i, "Ato kilonser @narendramodi-i Ladakh nung terenlok aser azükaru alitsü atema mangdang ayuba nung ajemdaker Ministry of Home Affairs-i union territory nung district tasen pongu tentettsütsü atema telemtetba agiogo. District tasen ponguji Zanskar,

Drass, Sham, Nubra aser Changthang lir, aser ibaji ajanga nübürtemi tajangzük angutsü," ta metetdaksü. 2019 küm tashibo Ladakh ya taoba mapang Jammu & Kashmir shilem ka liasü. 2019 küm August 5 nü Narendra Modi-i aniba sorkari India temzüng kübok Arlla 370 agienadok aser taoba mapang state agi Union Territories ana-Jammu & Kashmir aser Ladakh tentetja liasü. Taoba Honibarnü Amit Shah-i, linük temzüng kübok Jammu & Kashmir nem temeja maongka agüja aliba Arlla 370 ya kodanga tanaben lepa magütsütsü, ta metetdakja liasü. Jammu & Kashmir nung tongti regional party ana— National Conference aser PDP nati taruba election manifesto nung Arlla 370 tanaben angutsü

atema inyaksü, ta nangzuka lir. 2014 küm sülen tang mezüng September ita nung Jammu & Kashmir nung assembly election agitsü. J&K nung shilem asem lemsar September 18, September 25 aser October 1 nung election agitsü aser October 5 nü vote azüngtsü. Chhattisgarh yimtiba, Raipur nung osangbenertem senden ka nung jembidang Shah-i, "Arlla 370 ya Jammu and Kashmir nung tang-a mali aser kodanga malitsü. Iba ya kodanga tanaben lepa magütsütsü," ta metetdakja liasü. Ladakh nung ditriect tasen pongu tentettsü atema telemtetba agiba sülen Ato kilonser Modi-i X ajanga, "Ladakh nung district tasen pongu akümba ya yimsüsübaren tajungba akümtsü aser azükarutsü atema lir," ta metetdaksü.

J&K nung NC-i menden 51 aser Congress-i 32 nung tokteptsü

Srinagar, Luroi/August 26 (Agencies): Jammu & Kashmir assembly election nung National Conference aser Congress party nati longjemer tokteptsü atema telemtetba agiba sülen party ana tsüingda menden lemsaogo, ta osang ka ajanga metetdaksü. Assembly menden 90 aliba J&K nung National Conference-i menden 51 aser Congress party-i menden 32 nung tokteptsü party anati bangjemogo. Osangbenertem den jembidang J&K Congress Tir, Tariq Hamed Karra-i, "Onoki

(NC & Congress) CPI (M) atema menden ka aser Panthers Party atema menden ka anünga yutsüogo," ta ashi. Hameed Karra-isa, party ajak senden nung iba telemtetbaji agia liasü, ta metetdaksü. Srinagar nung osangbenertem den jembidang Karra-i, "National Conference-i menden 51 nungi tokteptsü, Congress-i menden 32 nungi tokteptsü aser onoki menden 5 nungbo peipei sasep nung tokteptsü bangjemogo. Menden 88 ajungba sülen onoki menden

ka CPI (M) nem aser menden ka Panthers Party nem lemzüksü," ta metetdaksü. Jammu & Kashmir Assembly elections atema ayongzükba osangbenertem senden nungji National Conference Tir, Farooq Abdullah-a liasü. Taoba mapang Jammu & Kashmir Chief Minister Farooq-i, "Yangi (J&K) nübürtem tsüingda telemsa adokdaksütsü merangertem anema onoki longjemer tokteptsü atema iba mapatong tenzükba atema kanga pelar," ta metetdaksü.



August 26, 2024 nü Kolkata nung Archbishop of Calcutta, Thomas D'Souza (ajichi)-i Mother Teresa asoba anogomong nung asür nem akhüm agütsüdang tangokba noksa nung angur.

BJP mapatong jembitsü asoshi Kangana nem temelaba magütsü: BJP

New Delhi, August 26 (Agencies): Actress aser BJP MP, Kangana Ranaut-i mangatettep adoktsüsa linük nung aluyimertemi longkak aitba dak sendakba olen ka jembiba sülen Hombarnü BJP-i, party mapatong dak sendakba olen jembitsü asoshi Kangana Ranaut nem temelaba agüja mali aser tashi-a agüja mali, ta metetdaksü. BJP-isa la dang tarutsü nungbo item ama o mejembitsüla, ta metetdaksüogo.

mapang nung tasümantem alenseta angu aser tetsürtem tashiyim amshia raksatsü," ta jembia liasü. Mandi nungi BJP MP, Ranaut-isa, aluyimba dak sendakba ozüng tasen asem sorkari agienadokogo, ajisüaka bendangertem aser nisung kari parnok tebilemba ataloktsü atema inyakba ajanga aluyimertemi maneni longkak aiter, ta jembi. "Bangladesh nung atalokbaji yangia ataloker lila," ta lai jembi. Taküm June 6 nüa Chandigarh airport nung CISF constable tetsür kati Kangana Ranaut dak tejak nung maoktsüba ajanga mangatettep tulu adoka liasü. Tesülen constable, Kulwinder Kaur-i, Kangana-i aluyimertem longkak aitba aija jembiba atema lai Kangana dak maoktsü, ta metetdakja liasü.

BJP lenir Ranaut-i, sorkari mera agia meinyak asübo aluyimertemi longkak aitba ya ajanga Bangladesh nung atalokba tensa ama ataloker lila, ta jembia liasü.



August 26, 2024 nü Bengaluru nung 'Global Conference on DPI and Emerging Technologies' sentong nung RBI Governor, Shaktikanta Das-i jembidang tangokba noksa nung angur.

Unified Pension Scheme agütsüba mezüngbuba state ji Maharashtra asütsü

New Delhi, August 26 (Agencies): Centre sorkari Unified Pension Scheme (UPS) sangdongba sülen ghonda ishika tsüingda central employees' organizations-i iba scheme atema takhangba agütsü tenzükogo. Sorkar mapa inyakerterem nem iba scheme agütsütsü atema nangzükba mezüngbuba state ji Maharashtra kümogo. Union cabinet-i UPS agizükba sülen ghonda ishika tsüingda Maharashtra nung sorkar mapa inyakerterem dang iba scheme nangzükker.

shiogo. Parnokisa OPS (Old Pension Scheme) sa tajungba, kechiyong iba nungjibo sorkar mapa inyakerterem nungi 'contribution' kecha menüngdaker, ajisüaka UPS agia parnok melung asür, ta ashi. All India Railwaymen's Federation aser national council of JCM nung secretary, Shiv Gopal Mishra-i, tang ama tensa ka nungbo UPS dang nungjagi tajungba kecha mali, ta ashi. Yakünü Union Cabinet-i Unified Pension Scheme agizükogo; iba scheme ajanga sorkar mapa inyakerterem nem pensions aser family benefits agütsütsü.

Central sorkar mapa inyaker lakh 23 Unified Pension Scheme (UPS) ajanga tajangzük angutsü aser state ajaki iba scheme agütsüra sorkar mapa inyaker lakh 90 iba scheme ajanga tajangzük angutsü. State tem dang iba scheme benoktsü ajungshia central govt employees nung tongti kettangsertemi, yimtenren party temi iba onük nung yimtenren maitdaksütsüla, ta

Iba scheme ya sangküm April 1 nungi mapa küma benoktsü aser National Pension Scheme mesüra Unified Pension Scheme shimtsü atema sorkar mapa inyakerterem nem temelaba agütsütsü aser state sorkartemia iba scheme shimtsü akok, ta sorkari metetdaksüogo.



TIR YIMYIM YIMOBILEM (EDITORIAL)

DIMAPUR SANGTENNÜ, AUGUST (LUROI) 27, 2024

Yi mayok aser majembo aremtsüla!

Naga nungertemi gari lenmang tamajung nunga arema jajateter, light maruyonga ajemajema litetteter, government mozü kidang doctor-tem maliyonga kecha masü, government school-tem nung class junga magiyonga ojang, government-i tajemtzü tzü peria magütsütetyonga sen agi alia ajemtsü aser lendongtsüdong ajuruba mapang government nungi teyari manguyonga kecha masü temeimertemi envelope bendentsüba agi tenük tasüng, ajisüaka Nagaland nung yi dokan lapoka ayoktsü memela nungbo pei taküm aser kibonga tipdema melitetsü amai kanga khuretsa bilemba nisungtem aika lir. Aji oda, yimjak nung yi meyokdaksüba agi parnok chirnurtem tajung maküm amai parnok jagi bilemer. Item jagi tanü asen lima nung lanurtem mozümora lar akümba tebilemstü ajak ya yi mayokba ajanga lir ta bilemer. Atangji, alima yimya asünungji, Eden tsüki nung dang masü tanü asen loktiliba nunga nisungtem dang ozüngi kechi techi, tejem, teinyak aser tebenshi ta ashir, itemji dang beshiner aser inyaker ta asüba nisungtema lir. Item jagi ozüngi memelaba mozü, yi aser osettsüsettemang yoka taküm alitsü meranger. Item jagi ozüngi melaba mapatem inyakba nungbo jangramatemer aser temulung masür. Item ama kibongtem aika tanü Nagaland nung ozüng anema yi ayokba agi takar akümba indang kanga jembir. Ibaji yazü masü shitak. Ajisüaka, nisung kar ozüng anema mozümora ayokba agi takar aküm nung, aji mereprangnü machimajemtsü mozümora ajak yimjak nung ayoktsü melatsüabajia masü. Kasaji, ozüng anema yi ayokertem takar mekümdaktsütsü asoshi yimjak nung yi mayoktsü lateta akaba ozüng agientsüabajia masü. Kasaji, sobaliba ozüng mamshitet kasa kidong o kidong na kibalembutep menokdangtetba agi larlapong malitsüba ozüng agientsüabajia masü. Iba amaji tanü asen yimten aser loktii menokdangtetba mapa ajak ozüngi melaba mapa kümdaktsüra asüngbo larlaponger alitsüabajibo tezü nung yutsür, asen loktiliba nunga tetsür o tetsür na aser tebur o tebur na apuani küma alitsüabajia ozüng melaba sobaliba kümadoktsü melarmelar akümtsü. Aji oda, tanü Nagaland nung yi yoknüba kulitem rongnung kaji, yi sadema mayokba ajanga sen tasak agi yi alia ajemer, anungji jenjang temela agi yi tajung langlangu alia ajemtsüsa yi ayoktsüla ta bilemer. Atangji, yi jemnertem asoshibo aji jangratemtsüka lir. Ajisüaka, Naga nungeri yi jemertem asoshi pei kima jenjang dalang agi yi tajung talubosa angubaji pei taküm asoshi temoatsübo masütsü aser pei kibong asoshia tesünep tepela angudakbo masütsü. Ano, Nagaland nung yi yoknüba kuli kaji yi ayokertem nungi saru agiba ajanga government asoshi sen arulen lenmang tajung ka lapoktsü. Aji oda, yi ayoktsü temelaba agütsüba, Licence fee, nungi tenzüker yi ayokba bottle shia nungi government nem saru tataktet ka agütsütsü alinung, atangji, ajia government asoshi sen arulen tajung ka asütsü. Ajisüaka, Nagaland ama ka state ka nung, anogo shia Inner Line Permit agütsüba nungi aruba sen-a kwi arur aser kong kechi atema amshiar mejangjaba state ka nung, yi ayokba sen agi nübertem ajangzüksüsa inyaksütsüabajibo pongmang nunga mepongmandemtsüba mapa ka lir. Atangji, yi yanglubaji tajemtsü yanglu, anungji tajem shia ajemertem asoshibo tajung asütsüa akok. Ajisüaka aika asoshi yi agi memeseptsüsa tajem shia ajemtsüabajia tasak, anungji tamasayongi majemang tajungba, iba jagi tsürabur shingai pei chirnurtem dang yi ajemtsübo mesayur aser majungshir. Atangji, Laishiba nunga yi kenyongi majemtsüla ta shiabo mangur saka yi agi memeseptsüba indangang shia angur, ajisüaka iba jagi yi ayoktsü aser ajemtsü melar ta masü, saka yiji samatsü renema alir nem jemdakjang ta dang Apijemtsü Shin 31:6 nung shia angur. Ibayongji, Nagaland nung arogoi yi ayoktsü memelunger. Ibaji tim dang lir. Arogoi yi ayoktsü mela nungbo iba arogo nungjibo madenang tajungba asütsü. Odang jembir dang ashi, yi ya yi ajemertemisa mejemnüba saka yi lar kümer metoktsüteter. Aji oda, asenoki lenmang tamajung nung jaja aremtetba aser light maruyonga arema litetba ama, temesepba chiyongtsü mayok, machi aser majema aremtetsülasang, jungla.

OLEMSABANG

BENDANGLN RANGLOKDANG ATEPZÜNG NUNG LANUR AIKA SAMADAGI

~ L.Kika Pongener.

(Yashi adik nungi...)

Anungji Aor arogotemi danga longjemer tanü asen lanurtem asoshi suoki yia bilema, lanurtem shirnok zünpet-züngrar mapa kecha maka taküm lisa-a lidagi, parnokji anidena Vocational Training tajung kar danga agidaktsütsüsa Impur nung 'Training Centre' ka lapoktet asübo kanga jungla, mesura mapang shia arogotemi achayanga 'Vocational Training' agidaktsütsü aser ano parnok sasa mapa karbo tenzüka inyaka otetsüsa senotsü teyari terara danga agüja yari nungbo kanga ajungtsü, mesura loan terara danga agüja yari nungbo kanga ajungtsü ama bilemer. Ano aji tang masü, zünger mapa maka alirtem (Educated unemployed) atema-a arogotemi longjemer sentong tajung kar atonga, teyari lenmang karbosa inyaksü takoktsü lenmang lir. Anungji arogo tulu aser takar arogotemibo tanga lima nung tangar kintem atema School & Training Centre balala lapokja sen lakh/crore tashi endoka inyakba-jia kanga junger, saka ano asen lima nung asen chirnurtem ajangzüksüsa mapa tajung kar danga inyaknungbo kanga ajungtsü. Tanü Dimapur ama Commercial City nung private company aika asen Naga nungeri rongsen akar aser tashi akartemi 'Engineering Company' ama lapoka idakji unemployed Engineering Diploma/Degree holders aika nem mapa agütsüba angur. Ibala mesuka ano arogo tulu/takar arogotemi Mission Hospital, Mission School & College etc. pei pei tashi yari kar danga lapoktet nungbo item nungji educated unemployed lanurtem karbosa mapa agütsütettsü. Dimapur Ao Baptist Arogo (DABA)-i lapokba Higher Secondary School ka lir, iba nungji lanur ishika nembo mapa agüja alitsü sudi. Mokokchunmg Town Ao Baptist Arogo (MTABA) aser Kohima Ao Baptist Arogo (KABA)-ia School/College karbo lapoka alitsü akok, ibala amaji arogo shiai pei pei akokba mapa kar danga inyaktet asübo kanga ajungtsü. Kokrabangla, arogo tulu-temibo arogo mission mapa kongsang ka ama, lanur zünger (Qualified) UPSC/NPSC etc. Exam. agütsütsü atema Coaching aginur, saka senotsü makaba agi tezüdanger alirtem küm shia teshimtet kar danga yaritetra, ibaji mission mapa tulu asütsü. Bendang lima nung aliba lanur aser tangar kintem dak mungdang aser arogotemi rongsen jenti endoka mission mapa inyaktepdang, asen atepzüng nungbo asen lanurtembo kar yiar amai kümer nemzür, kar Jail/Rehab Center nung moktepa kazüteper, aiur chanutem karbo pei teküp yoka nemzür. Tanü Assam-India lima nung oa mapa balala inyaka alirtemji ashiko, ajakbo mapa tajung inyaker masütsü akok, talisa aiurtem karbo Hotel-tem aser Company balala nung taküm tia raksatsüsa mapa tamajung inyakera alitsü akok.

Anungji joko mungdang aser arogotemi bendanglen rangloker rongsen jenti endoka Mission mapa inyakba inyakyim ya khen meyipa reprangshitsüla-a ta bilemer. Kechiba sura asen atepzüng nung asen chirnur aser semchi-semnurtem khen meyipa reprangtsüba mapang kati menepogo. Mungdang lenirtemi anir lim arogotem nung tenzükertemi ya khen suoki yia bilemdangtsüla. Asenoki suoki yia mebilemi zübazüba-a dang alir ashi, jungjunga reprangdangra, asen lima nung lanurtem aika kangasa temeimtsü tia nung taküm tia raksaba zünger mezüngmai-ka lir. Aser item lanurtemji asüng asen lima nung yimden, arogo aser loktiliba asoshi tebilemstü khuret tulu bentsür arurtem asütsü. Asenoki sorkar dak dang yimlar zübazüba-a toktsüra, asüng itemji kibongtem atema dang masü, saka yimden, arogo aser loktiliba atema tebilemstü khuret tulu asütsü. Anungji mungdang aser arogotemi 'Azünglu nung dang tenuk meyoki Ongpanglua khen meyipa reprangdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China aser North Korea nati longjemer Khristantem reshikangshir



China-i North Korea nungi jena arur refugees tanaben North Korea-i meyipa yokba anema meimchir temeden atema inyaker teloki longkak aitdang tangokba noksa nung angur.

August 26, 2024:

Khristantem reshikangshiba tsütsü China-i maneni North Korea linük yarir, ta International Christian Concern (ICC)-i metetdaksü.

Tawa United States Commission on International Religious Freedom (USCIRF)-i report ka ajanga North Korea nung Khristantem reshikangshiba maparen nung China-i yaritepba metetdakja liasü.

USCIRF sangdong ajanga, "China nung jenoka aliba North Korea nung refugees tanaben North Korea-i yoktsü atema China sorkari maneni North Korea den yariteper. North Korea-i tanaben yokra parnok reshikangshitsü mesüra temerenshi tulu angutsü, ta metetsümonga Khristan maparen nung shilem agirtem aser Khristan missionary tem den tongtepratepa alir Khristantem aika North Korea-i meyipa yokor," ta metetdaksü.

North Korea aser China na arrtsütepa lir, anungji North Korea nung aikati reshikangshi marem China-i jena oa alir. Khristan aikati Khristan missionary temi parnok yaritsü ta teimla nung parnok bushir, ajisüaka China ketdangsertemi parnok apur. China nung ketdangsertem ket nung North Korea nung refugees-i timtem ajangshiba aser nisung shi belenba tatalokba aika lir," ta USCIRF report ajanga metetdaksü.

North Korea nung tamangba

yimsü temeden khenyongi mali.

Taküm May ita nung USCIRF indang report ajanga, "North Korea sorkari Khristantemji linük anemertem aser ashioktsürtem ama züngshir, aser ibaji yimtenren anema inyakba ta züngshia tepsettsü langa lir ta züngshir. North Korea nung nisung ka ket nung Laishiba aliba, yimsü kar amangra mesüra Khristan ka süra reshikangshitsü akok, kangshia mapa tasak inyakdaksütsü, tepuokdak ayutsü mesüra tepseta indoktsü akok," ta metetdaksü.

North Korea sorkari linük toktsür jena aoertemji linük ashioktsürtem ama züngshir, anungji linük toktsür aoertem pura temerenshi tulu agütsür.

Iba ama tensa ka nungji China sorkari North Korea nung refugees tem pua North Korea-i tanaben meyipa yokor.

Yaküm October ita nung South Korea yimtiba, Seoul nung amenoka aliba Transitional Justice Working Group (TJWG) teloki sangdong ka ajanga, China-i North Korea nung refugee 600 shi North Korea-i meyipa yokogo, ta metetdaksü.

Khristan melungtet telok, Barnabas Aid-ia China ketdangsertemi North Korea-i meyipa yokba North Korea nung Khristantem kanga reshikangshiba osang metetdaksüogo.

"China nung bushisüngdangertemi North Korea nung kanga reshikangshiba sülen ang North

Korea-i tanaben meyipa yokor. North Korea atongba sülen Khristantemji "re-education" camps nung puoka yur reshikangshir," ta Barnabas Aid teloki metetdaksü.

Item kulitem ajanga Khristantem reshikangshiba maparen nung China-i North Korea sorkar den amalitepa inyakba kuli jangjar.

Yaküm December ita nung U.S. Congress nungi nisung 15-i shidi ka ajanga United Nations High Commissioners Volker Turk aser Filippo Grandi na dang China-i North Korea nung refugees reshikangshiba atema China aitsütsü mepishia liasü./

Shidi nungji yamai shia lir, "Item refugees teimbaka tetsür-tanurtem lir. Parnok North Korea-i tanaben meyipa yokra yangji parnok tashiyim amshia raksatsütsü, reshikangshitsü, pua ayutsü, kangshia mapa tasak inyakdaksütsü mesüra tepsettsü."

"China-i 1951 Convention nung 'Status of Refugees' alema inyakba atema United Nations-i China anema kecha meinyaker. Iba Convention kübok sign süa aliba linüktemi pei linük nung refugee tem meyipa meyoktsüla. Communist Chinese Party (CCP)-i iba temzüng anema inyakba atema UN-i China aitsütsüla. CCP aser PRC (Peoples Republic of China)-i North Korea nung refugee tem anema inyakba atema UN-i aitsütsüla," ta kasa shidi ajanga metetdaksü.



Nagaland nung mezüng süa Kumlong Baptist Arogo Christian Education Ministry-i ayonga "My Body is My Body" ta sür International sentong ka Deobarnü KBA tenla kidang akaba mapang telok külemi tangokba noksa nung angur. Iba ya tanurtem pei temang kümzüka ayuba den tanur dak tim mesüi beshiba (child abuses) aser tashiyim mapa balala nungi koda kümzüka alitsü iba indang tesayuba agütsüba sentong ka lir.

Mokokchung, August 26, 2024.

ANOGO ABEN TSÜNGREM DEN

Temoatsütem ajak kü meyong

"Yisu Khrista ajanga asenok Tsüngremi Pa chirtem ama akümtsü mezüngyongi shimtet"

(Efesa 1 :6)

Asenok Tsüngrem chirtem asütsü Pai shimtet, taidok agütsü, alanzük, takar kümdaktsü aser asenok temoatsü aika agizükertem kümdaktsü. Item temoatsütem agia aodang asenoki teti tenüngsanga kümdang kümdanga alitsüla. Asenoki Tsüngrem tushidang Pai asenok agizüker aser meyiper pai ano tali dang moatsür. Asenok temenen taküm süaka Tsüngremi techir Khrista agizükba ama, Pa temeim nung asenoka agizüker.

Khristan aikati Tsüngremi parnok agizük asü masü ta ratar. Tamakok ngura Tsüngremi magizük ama bilemer. Kanga ratar aser tetsübu agi süngdaktsür. Iba amala arendaka aser temulung makai bilembatemji ajak Satan nungi aruba lir, Tebu nungi masü. Asen tashi kisüngi inyakbaji Tsüngrem tsüngdang tagizükttetsü masür. Saka asenok agizükba küliji - Yisu Khrista tabensa Tsüngrem chir shibai Tebui yok pa ajanga asenok alanzükogo.

Shirnoki Pa tsübur aser temenen lenmang nung mejajar; temoatsütemji parnok meyong asütsü. Alima nung temoatsü tulu angutsü asoshi tanü Pai asenok Pa tsüngsü nung jajar nisung kaka südaktsüner.

Protestant shilem 81-i Khristan film tem ya hadir tajung ama bilemer

August 26, 2024: Protestant

Khristan shilem aikati Khristan film tem ya Khrista osangtajung prokba maparen nung kanga tongtibang hadirtem lir ta bilemer, ajisüaka Khristan aikati mamanger medemertem den Khristan film tem külemi reprangtsü atema arendaker, ta survey tasen ka ajanga bushitet.

Mongolbarnü (August 20) Lifeway Research-i iba report sangdonga liasü.

Yaküm September ita nung agiba survey nung ya America nung Protestant Khristan 1,008-i shilem agia liasü. Iba survey nung Khristantem dang Khristan film tem aser Khristan kakettem dak sendakba nung tasüngdangba balala asüngdanga liasü.

Osangtajung prokba nung Khristan film tem ya hadir tajung asü? ta asüngdanga liasü. Iba survey nung shilem agir Khristan 81-ibo Khristan film tem ya Khrista osangtajung prokba nung hadir tajung lir ta langzü.

Shilem 33-ibo Khristan film tem ya Khristai tenyaba wadang nung hadir kanga tajung ta ashi aser shilem 48-i atangji iba ya hadir tajung ta langzü.

Ano Khristan shilem 12-ibo Khristan film tem ya Khrista osangtajung prokba nung hadir tajung masü ta ashi.

Iba survey nung shilem agir shilem 72-i parnoki Khristan film tem repranger ta ashi.

Khristan shilem 68-i tesüiba küm küm ka tsüngda parnoki Khristan film kabosa reprangogo ta ashi aser shilem 12-ibo Khristan film reprangtsü atema parnoki mamanger medemertem jaoka külemi Khristan film reprangogo, ta

ashi.

Denomination balala sasep nung Non-denominational Khristan shilem 77-i tesüiba küm ka tsüngda Khristan film kabosa reprangogo ta ashi, Baptists shilem 70, Lutherans shilem 53 aser Presbyterians shilem 49-ia tesüiba küm ka tsüngda parnoki Khristan film kabosa reprangogo, ta iba survey ajanga bushitet.

Non-denominational Khristan shilem 60-i tesüiba küm ka tsüngda secular film kabosa reprangogo, Presbyterians shilem 57, Baptists shilem 44, Lutherans shilem 41 aser Church of Christ shilem 37-i tesüiba küm ka tsüngda secular film kabosa reprangogo.

Non-denominational Khristan shilem 15-i tesüiba küm ka tsüngda Khristan film reprangtsü atema Yisu dak mamanger medemertem jaokogo; yamaji Baptists shilem 14, Church of Christ shilem 14, Lutherans shilem 3 aser Presbyterian shilem 3-ia küm ka tsüngda mamanger medemertem jaoka Khristan film külemi reprangogo.

Tesüiba küm ka tsüngda metetsümonga Khristan film tem bushia repranger teimtibaji Baptist Khristantem (shilem 78) aser non-denominational Khristantem (shilem 78) liasü.

Yamaji Methodists shilem 59, Church of Christ shilem 58, Lutherans shilem 57 aser Presbyterians shilem 55-ia metetsümonga Khristan film tem bushia reprangogo.

Prayer ministries aika temoatsü kanga anguba film anaji 'War Room' aser 'The Battleplan for Prayer' na liasü.

AO OSHI ANGAZÜKDAK: TANÜ ANGAZÜKTSÜBA OJANG



Tamanguba

(n) angutsü makokba (invisible)

* Tamanguba lendong nungi Tsüngremi asenok kümzüker.

Tamarama

(adj) shisatsü ramaa aoba (loose sense)

* Tsüraburtem aika yakta tamarama akümer.

OLONG PAITEP # 6907

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6906 TELANGZÜBA

TIPIEN :

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju,
- 21. Ano, 22. Onü, 23. Kua.

NAI-A YA METETTER MA

MOST CONSECUTIVE WINS

IN MEN'S T20Is

	SPAIN	14*
	MALAYSIA	13
	BERMUDA	13
	AFGHANISTAN	12
	INDIA	12
	ROMANIA	12

sportskeeda

T20I history nung Spain-i otsü tasen ka yangluogo aser ibaji takok teimtiba anguba lir. Europe T20 World Cup Sub Regional Qualifier C nung Spain-i wicket 7 agi Greece madak takok angu aser ibaji parnoki T20I nung 14 ben atongtepa takok anguba lir aser world record kümogo. International Cricket Council (ICC) rankings nung Spain ya tang 29 buba jenjang nung lir.

Assam RS elections nung BJP den tetokteper melii takok nguogo



Guwahati, August 26, 2024

(Agencies): Bharatiya Janata Party (BJP)-i Assam nung tetokteper shinga melii Rajya Sabha menden ana nung takok nguogo.

Assam nung opposition-i candidate meyokba ajanga Rameshwar Teli aser Mission Ranjan Das nati takok angu aser Guwahati nung returning officer Rajib Bhattacharjya-i tena nem kulikakettem agütsüogo.

"RS election atema

agütsüba meyipa anogo tatebangbaji tanü liasü aser candidate tena dang asüba yong tetokteper shinga melii takok angurtem ta sangdong aser kulikakettem agütsü" ta Bhattacharjya-i ashi.

Mission Ranjan Das aser Rameswar Teli nati August 21 nü Rajya Sabha candidates ama nominations agüja liasü.

Teli-i nomination paper agütsüba sülen "opposition

candidates shinga mali anungji iba amai dang süra küna den tetokteper shinga melii takok angutsü" ta shia liasü.

Rajya Sabha menden anaprong ya BJP ket nung liasü saka Lok Sabha election nung taoba union minister Sarbananda Sonowal-i Dibrugarh menden aser Kamakhya Prasad Tasa-i Kaziranga menden nung takok anguba sülen Rajya Sabha menden ana tazüng aküm.

PM Modi-i Tripura tzümetsüng asoshi yaritsü nangzük

Agartala, August 26, 2024

(Agencies): Tripura Chief Minister Manik Saha-i Prime Minister Narendra Modi aser Union Home Minister Amit Shah na den tzümetsüng khuret indang lemsatepogo.

"Prime Minister Narendra Modi den state nung tzümetsüng tensa indang osang lemsatep. Pai akokba tashi Tripura nunger yaritsü nangzükogo. Prime Minister-i temeim mapa sayuba atema kanga pelar" ta CM Saha-i ashi.

Union Home Minister Amit Shah-ia Centre sorkar nungi teyari agütsütsü nangzükogo ta

paisa ashi.

Amit Shah-i Saha dang central team ka Tripura-i yoktsü aser parnoki tensa asadangba den nungdakba teyari agütsütsü ta ashi.

Tripura sorkari Centre dang Inter-Ministerial Central Team kati tzümetsüng tensa asadangtsü mepishia liasü.

Tripura nung tzümetsüng tensa tajungba kümdar kechiyong nisung teimbaka relief camps toktsür ogo. Relief camps 471 nung nisung lakh 1.20 shi jenoka liasü saka tang 70,000 shi dang lir.

"Tesüiba anogo asemnü

tzünglu ajema aruogo saka Gomati River nung tzü danger level adena yimdar" ta Relief, Rehabilitation & Disaster Management Department-i metetdaksü.

Hombarnü State Disaster Response Force (TSR) telok 3 aser National Disaster Response Force (NDRF) telok 5-i Gomati aser Sepahijala District tem nung relief operations inyakdar ta parnokisa ashi.

Tzümetsüng lendong balala nung nisung 26 asü, 2 yiru aser 1 samar bushitepdar ta department-isa metetdaksü.

Syria nung ita 20 lir külen Mizo tsür 3 kümzükogo

Aizawl, August 26, 2024

(Agencies): Mizoram Police-i Syria nung ita 20 shi ka anendaka alir Mizo tsür asem anir aruogo.

Tetsür asem ya 2022 küm Mizoram toktsür ao aser iba küm November ita Syria atongba sülen timtem ajurua liasü.

Mizoram police aser Indian Embassy ketdangsürtemi kanga meranga inyakba sülen Mizo tsür asem August 20 nü Syria toktsür

Honibarnü Mizoram tongogo.

Par asem ya ana Hnahthial district nungi aser ka Champhai district nungi lir. Private placement agency kati ozüng alema par asem ya Syria nung kidang yariteper ama alitsü atema yokba liasü.

Chief Minister Lalduhoma aser Home Minister K Sapdanga nati iba ken o süoki ia agi aser taküm May ita nungi par asem kümzüksü atema mapa tenzük.

Iba dak sendakba nung okadak ken o tem dena liasü aser state sorkari Indian embassy o Syrian ketdangsürtem den osang agitepa aru.

Okadak ken o akokba sülen Damascus nung aliba Indian embassy nung Mizo tsür asem hopta asem tashi jenokdaksü aser exit visas anguba sülen August 20, 2024 nü New Delhi tonga anir aru.



India telungi ozüng alema nisungtem anir arur tetsür ana Border Security Force (BSF)-i apuba sülen agiba noksa angur. India aser Bangladesh arrtsü anasa Sastarghat Pt-III nung tena apu aser iba tesem ya Assam nung Dhubri District kübok lir. Tetsür ana ya Mantrirchar nungi Jobeda Khatun aser Sastarghat Pt-III nungi Taherun Bibi na ta jangjaogo aser tena ya kinunger lir. BSF-i tena apuba sülen Dhubri Police ket nung agüja tena anema FIR ka benokogo. Anogo ishika tejakdang Dhubri Police-i Lipi Akhtar ta ser Bangladeshi nunger ka Jogomaya Ghat nung apuba sülen ozüng alema nisung anir arur Ali Hussain apu.

Pakistan nung telungpuri nisung 38 tepset, BLA-i tenüing agi

Islamabad, Luroi/August 26 (Agencies): Pakistan southwest tsütsü Balochistan province kübok tesem asem nung telungpur temi nisung 38 tepseta liasü.

Musakhail district kübok Rarasham anasa tesem tezülen telungpur temi Deobar aonung buss aser trucks tem anendakja gari nung mena alir indang ID reprangba sülen nisung 23 khaset aser gari 10 nung mi senloksür jena ao.

Ano kasa province kübok Qalat district nung police tanishir pezü aser süyisübonger pongu khaseta liasü.

Kasa anogosa Bolan nung railway track ka poksatsüba mapang nisung trok asü, Mastung nung police station ka amak aser kasa province kübok Gwadar yimti nung gari kar rondoktsü.

Item lendong agütsüba ya Baloch Liberation Army (BLA) teloki tenüing agiogo.

BLA yagi nüburtem dang Balochistan kübok highways nungi pila alitsü tekum dangtsü shir mapang tatsüka lir Punjab province den sendaktepba highway nung maka liasü.

Iba telok yagi sangdong ka nung civilian süoshi semer senzüba mitkartem dak tenük yok aser parnok jangjatetba sülen khaset, ta ashi.

Ajisüaka Pakistan indang Ministry of Interior-ibo asürtem ya tai maket nüburtem lir ta ashi.

“Punjab nungi aruli-oli ta senzüba gari tem semdang, aser Punjab nungi nisungtem jangjateta khaset,” ta Musakhail nung ketdangtsür Najibullah Kakar-i ashi.

Yirur alirtem ya Dera Ghazi Khan nung aliba mozüki kati anir ao, koba anasa mozüki tulutiba alitsü.

Tir Asif Ali Zardari aser Interior Minister Mohsin Naqvi nati sangdong balala nung

Musakhail azüdokshi aitsü aser lendong agütsürtem yamaji metoktsütsü ta nangzük.

Punjab provincial sorkar indang odongtar Uzma Bukhari-ia iba azüdokshi ya tebilemsü tulu lir ta ashi aser Balochistan provincial sorkar dang BLA kiralongrar samatsütsü atema mera agitsü ayongzüka liasü.

Balochistan Chief Minister Sarfraz Bugti-ia lendong agütsür nem ochi obendang agütsütsü nangzük.

Tesüiba ghonda 24 tsüngta province nung security forces temi telungpur nisung 12 tepsetogo, ta ashir.

Balochistan nung taoba mapanga iba ama lendong agütsüba ya BLA-i tenüing agia arur.

Balochistan ya ali rongsen jenti aliba province ka lir, kong Punjab nungi mapa inyakttsü arurtem dak BLA yagi tenük yoker amaker.

AFFIDAVIT

I, Smt. R.ACHILA daughter of C. RONGSEN JAMIR, age 50 years, by profession a Teacher, permanent resident of Longkhum Village, presently residing at House No. 313 Kumlong Ward, Mokokchung Town, P.S – Mokokchung, P.O – Mokokchung, District – Mokokchung, State – Nagaland, do hereby solemnly affirm and declare as follows :

1. That, I am the deponent of this affidavit and a bonafide citizen of India.
2. That, my father's name is C. RONGSEN JAMIR and therefore, I have been using the initial letter 'R' derived from the spelling of my father's name before the spelling of my name and thus asa 'R ACHILA'.
3. That, sometime, the people of my locality, my friends or in official correspondence my name is spelled as ACHILA and ACHILA JAMIR, deleting the alphabet 'R'.
4. As a result, my name R. ACHILA, ACHILA JAMIR or ACHILA is used both in official and private correspondence whereas the person, that is I myself is the same.
5. That, the contents of paragraph 1, 2 and 3 above are true to the best of my knowledge and believed to be true being derived from records.

DEPONENT :
(R. ACHILA)

Solemnly affirmed and declare before me by the deponent on this the 31st day of January, 2019, at Mokokchung.

L. B. Namu
NOTARY PUBLIC, MOKOKCHUNG

METONGSHITSÜR

Tir Yimyim adok 313, 26 August, 2024 tapak 7 nung Longsa Senso Mungdang ajanga Metetdaksüba osang nung Longsa Lenden nung ta alibaji Longsa Salang Lenden ta metongshitsür. Aibelenba asoshi sasar.

Tir Yimyim Office Mokokchung.

China-i Myanmar den arrtsü nüka atattsü sepai talila yokogo

Beijing, Luroi/August 26 (Agencies): Myanmar nung

military aser coupe anema nokdakba teloktem tsüngda mangatettep tali küma aoba mapang ka nung China indang military-i Myanmar den anüolen arrtsü tali meita atatsü atema army aser police yokogo.

Patrol kong air surveillance densema lir, iba ya talisa Ruili, Zhenkang jila aser lendong ataloktsü ana nung aliba tesemtem dak rangloker inyakttsü, ta military-i Hombarnü sangdong ka ajanga metetdaksü.

Ruili jila ya China kübok Yunnan province nung lir aser iba jila ya nüburtem senzüsenpongba aser khu belenshiba lenmang tongtiba nung amenoka lir, ajisüaka China-i ashiba agi, Myanmar kübok Shan State nung mangatettep tali küma aoba mapang artillery injang balala ajanga iba jila nung alirtem yirutsüba den kiojena raksatsüogo.

Telungpurtemi iba tesem nungi military mintoktsü atema alliance ka yangluba sülen taoba küm nungi iba tesem nung rara tali kümogo.

January ita Beijing teyongtsü ia yimjung asoshi tenangzüktepba ka yanglu saka June ita iba tenangzüktepba raksago aser telungpurtemi ashiba agi, parnoki Myanmar military post tem atsüngtokba den tongtibang jilatem azüokogo.

Kasa mapang nung military-ia meyiper bomb pokloksüba den drone amshia item telungpurtem makdar aser iba den internet aser mobile phone network tena nokdanga arudar.

Mepetmesü tulu adokba sülen nisung meyirejang aika pei talidak ki toktsür jenshiaogo.

Chinese People's Liberation Army, Southern Theater-i, arrtsü nung tetsükdaksü balala adokba nungi jenboa alitsü atema parnoki army unit tem tentetja parnok tashi asadangogo,” ta military-i ashi.

Chinese Foreign Minister Wang Yi-i tawa ashiba agi, Myanmar nung yimjung bener arutsütsü atema China-i maneni inyakttsü.

2021 küm February ita military-i Aung San Suu Kyi-i aniba sorkar atsüngtokba sülen Myanmar mepetmesü tulu nung lir.

Ita ka nung Kamala Harris-i sen \$540 million bendenogo



Washington, Luroi/August 26 (Agencies): Vice President Kamala Harris-i United States tir asoshi nübuyim tenzükter ita ka dak tera agi tali nung sen \$540 million bendenogoaser taoba hopta Democratic National Convention nung tali benden ta lar campaign ajanga ashi.

Harris indang campaign manager Jen O'Malley Dillon-i memo ka sangdongba nung sen \$540 million bendenogo aser yangji taoba hopta mungdang mapang aruba sen \$82 million dena lir ta ashi, anungji la dak Democratic teloki temulung asüba sayur.

“Brehostibar aonung Vice President Harris-i nomination agizükba o jembitsü lia sen \$500 million junger liasü,” ta O'Malley Dillon-i memo ka nung züluba campaign ajanga

Deobarnü sangdonga liasü.

“La o jembizükba sülen onoki ‘fundraising hour’ tajungtiba angu. Tir asoshi nübuyimba nung mapang tatsüka tsüngta sen timtiba bendenbaji iba ya alitsü,” ta lai ashi.

Mungdang mapang sen tenla agütsür ya shilem asem jungnüa mezüing tenlaritem nungi lir, ta O'Malley Dillon-i ashi. Mezüing tenlar shilem pongu nung shilem ka lanurtem lir aser shilem asem nung ana tetsürtem liasü.

Harris campaign-isa tatong tir atema volunteer tem tali akumba angur ta ashi. Mungdang mapang nübuyimba nung yariteptsü atema volunteer 200,000 jungnüai tenüing agüja liasü.

Tir Joe Biden arishi küm nung tain akumba aser June 27 nü Republican telok nungi

toktepsang Donald Trump den o intepba mapang junga shilem magitetba ajanga külem Democrats temi ajungshiba ajanga July 21 nü pa ainshiba sülen Harris ya tir atema candidate akum.

Harris nübuyimba nung jenjang tajungba akumba ajanga Trump sadoksayim mesüteter aser media tsütsü pa timtemer.

Trump yagia sen jenti bendener, saka tang atemabo Harris-i ita ka nübuyimba yagi ajatetogo.

Trump indang campaign-i July ita sen \$138.7 million bendentet ta ita tetenzüklen sangdonga liasü, koba Harris-i White House asoshi toktep tenzükba hopta nung bendenba dang tajemba. August ita tetenzüklen cash on hand sen \$327 million lir ta Trump indang campaign ajanga shia liasü.

US nung tir atema election ya November 5 nü agitsü lir.

North Korea lenir Kim-i achaayanga suicide drone tendang

Pyongyang, Luroi/August 26 (Agencies): North Korea lenir Kim Jong Un-i achaayanga linük nung yangluba attack drone tem tendangogo, ta state media KCNA sangdong ka ajanga metetdaksü.

North Korea media-i Hombarnü lemsatepba noksatem nung X-shaped tepen aser tsahikang keta aliba drone temesüing ka target ka dak oa tsükoka raksatsüba nguogo. Target ya South Korea indang K-2 main battle tank mesüka liasü.

Kim shiba pa indang adviser temi meketbanger table ka nung mena aliba noksa nung anguogo, pai par linük military modernize süa aruda aser iba den prangbong injang balala tashi ajungketa arudar.

Washington aser Seoul na den mangatettep adoka aruba mapang ka nung tang pai iba jenjang agidar.

Drone Institute of North Korea's Academy of Defense Science semdangba mapang North Korea lenir yagi achaayanga iba drone tendanga ajangasa metetdaksü.

Kim-i ashiba agi, alima ajunga nung military technology aser modern combat yimyatem reprangdangra rara nung drone amshiba koda tongtibang aji reprangteter, aser iba den putepa Pyongyang-a takokba tashi takaratiba nung item ya yanglur alitsü nungdaker.

Paisa, infantry aser special operations unit temi amshitsü atema exploding drone tem

densema reconnaissance aser multi-purpose attack drone aser underwater suicide attack drone tem amala takaratiba nung yanglutsü nungdaker ta ashi.

Pyongyang-i, South Korea amaktsü nükjidong nung short-range missiles aser heavy artillery tem aika yanglua arudar. Alima kintemi tenokdangba agütsür aliba mangai longer-range ballistic missile aser nuclear programme tem terenlok asoshi jenjang agiba sülen tang parnoki iba jenjang agidar.

United States aser South Korea nunger sepaitemi military exercise tulu ka ayongzüka agiba mapang tang iba drone ya tendangogo. Iba military drill ya Brehostibarnü tashi agitsü.

NWA-i Nagaland Chief Minister den ajurutep



NWA kedingang Chief Minister den pa indang Official Residential Office nung tangokba noksa nung angur.

Kohima, Luroi/August 26 (TYO): Nagaland Wrestling Association (NWA)-i August 26 nü Nagaland Chief Minister Neiphi-u Rio den pa indang Official Residential Office nung ajurutepa, NWA sentongtem aser inyakyimtem indang metetdaksüba den state aser state adena or wrestling asaya ajungkettsü atema teka amteper inyaksü aser nongita yaritsü pa dang mepeshia liasü.

NWA Joint Secretary, Kuzhovesa Soho-i sangdong ka ajanga ashiba agi, NWA-i Chief Minister dang Association-i, wrestling masayaba kintem nem Naga Style, national styles aser tanga international wrestling styles tem dak sendakba nung tangazükba agütsütsü atema taküm September aser October ita shilem balala kuma lemsar wrestling training aser coaching camp ayongzükba katsütsü sentong aliba lemsatepa liasü.

Kasa sangdong ajanga ashiba agi, lanur asayartem Naga wrestling fraternity mainstream nung adentsü atema ajungmesotsü aser parnok

December ita taruba International Hornbill Naga Wrestling Championship aser 2025 küm February ita tatemlen Open Naga Wrestling Championship nung shilem agitsü atema ajungmesotsü atema sabang ka agütsütsü nükjidong nung iba sentong ayongzükba.

Maneni Open Naga Wrestling championship 2025 tembangba sülen wrestling masayaba kintem atema state level Naga wrestling championship balaka ayongzükba katsütsü atema NWA nükjidong lir ta, parnokisa metetdaksü.

NWA-isa, 17buba International Hornbill Naga Wrestling 2024 ya jenjang balalaka nung ajungketa akatsü sentong aliba lemsatep, kong mainland India aser bendanglen nungi dena wrestler tem jaoka asayatsü sentong aliba lemsatep. Parnokisa tensa apir iba asayamung Khuochiezie nung asayatsü benokdanga liasü.

Senden nungsa Nagaland


sorkari ayongzükba November ita asayatsü aliba Asian Belt Wrestling Championship 2024, State wrestling Stadium aser NWA office yanglutsü atema benokdanga aliba onüktem sensaksema liasü.

Maneni Chief Minister-i parnok tebilembatem kanga nendaka angaba aser Association-i benokba onüktem agizükba atema NWA-i kanga pelaba lemsatepa den CM-i Association maneni nongita yaria state nung wrestling asaya temaba jenjang kati ajungkettsü imlaba lemsatepa liasü.

Wrestling masayaba kintem atema sentong balala ayongzükba katsütsü benokba kanga pelashishia agizüba den Chief Minister-isa NWA nem takokba tashi teyari agütsütsü tenangzükba agüja liasü.

NWA team ya tir Vivolie Kezo-i anir ao aser kasa mapang nung Minister for Power & Parliamentary Affairs KG Kenye aser Advisor CAWD & Taxes Kudecho Khamo nata senden nung dena liasü.

Barcelona-i Vitor Roque Loan nung Real Betis-i yokogo



Luroi/August 26, 2024 (Agencies): Barcelona-i striker Vitor Roque, La Liga club Real Betis dangi Hombarnü loan nung yokogo. Barca nung dener ita ishika tsüngda pai junga masayatetba sülen tang pa loan nung yokogo.

Barcelona-isa, centre-back Clement Lenglet loan nung Atletico Madrid-i yokogo.

Brazil nunger forward Roque ya Barcelona-i 2023 küm July ita euro million 30 shi agi alizükba sülen pa January ita

Athletico Paranaense nungi Barca nung oa dena liasü.

Taoba season parnok anemer Real Madrid-i La Liga aser Champions League naprongla akokba repranga aliba mapang Roque-i Barca nungi asaya 16 nung goal ana idaktsü

“2025 küm June 30 nü tashi Vitor Roque loan nung oa asayatsü asoshi FC Barcelona aser Real Betis na tangatettep ka dangi aruogo,” ta Barcelona-i sangdong ka ajanga

metetdaksü.

Barcelona-isa, arishi küm 19 tain asayar ya teti atema alizüktsü asoshi Betis pur atema lenmang sadema lapoka yuogo.

Kasa mapang nung France nunger arishi küm 29 tain defender Lenglet season tatem tashi asayatsü asoshi Atletico nung denogo. Pa taoba mapang Tottenham aser Aston Villa na nung loan nung oa asaya liasü.

Barcelona pur rongsenketzung nung tetsükdaktsü aliba aser league indang financial ozüing tesashi aliba ajanga tang transfer window nung alizüksang Dani Olmo La Liga nung mezüngoksemteti lir.

Parnoki taoba hopta Ilkay Gundogan Manchester City-i meyipa yokogo aser iba ajanga Olmo züngoksemtsü asoshi lenmang lapoktsütsü ta coach Hansi Flick timla lir, ajisüaka Olmo ya Honibarnü Athletic Bilbao den asayaba asaya nung shilem magitet.

'Kü rara tang ang tenzükogo': Vinesh Phogat


Luroi/August 26, 2024 (Agencies): Olympic wrestler Vinesh Phogat, shiba tawa tembangbuba Paris Olympics nung 50-kg final nung disqualify süa liasü, la nem Deobarnü Sarvkhap Panchayat-i gold medal ka agütsüogo.

“Kü rara metembang, rara tang ang tenzükba. Jalattem meraket atema rara tang tenzükba. Longkak aiba mapang onoki kasa ya shiogo,” ta Phogat-i la atema ayongzüktsüba sentong nung o jembiba mapang ashi.

Tetsür asayartem dang mebeshitsü yimya beshiba atema Wrestling Federation of India tekolakba aser BJP lenir Brijbhushan Sharan Singh anema taoba küm longkak aiba mapa wrestler tem rongnung la a densema liasü.

“Ni Paris nung masayatetba mapang ni kanga tia maka ta bilem, saka India-i meyipa arur nüburtemi kü dang temeim sayuba aser ni nongita yariba ngua ni kanga tia taka ta bilemer,” ta lai ashi.

Phogat-i ashiba agi, iba amala inyakyim ajanga tetsür asayartem ajungmesotsü aser parnok timtem nung aliba mapanga par lokti-i parnok mesentoki nongita yaritsü ta metetdaksütsü.



“Iba tetushi agütsüba ya ni kodanga mamatsü, koba medal ajak dang nungi taoba lir,” ta lai ashi.

Phogat shiba Haryana kübok Balali nungi lir, la Paris Olympics nung temulung raksatsüka 50-kg final asayatsü lia temang tozük tali akümba ajanga disqualify süja liasü.

Phogat, Honibarnü Indira Gandhi International Airport tonga aru aser la Bajrang Punia, Sakshi Malik aser panchayat lenirtemi agizükba liasü.

Final asayatsü lia la temang tozük tali kümer aliba ngutetba sülen la temang tozük tajemba kümdaktsütsü atema aonung sangwa kanga meranga inyak saka takok monguteti liasü.

Iba sülen Phogat-i la nem silver medal danga agütsütsü mepeshi, saka Court of Arbitration for Sport (CAS)-i magizüki liasü.

Taoba mapang England coach Sven-Goran Eriksson süogo



Luroi/August 26, 2024 (Agencies): Taoba mapang England football team coach Sven-Goran Eriksson Hombarnü arishi küm 76buba nung süogo, ta pa indang agent-i metetdaksü.

Sweden nunger Sven-Goran Eriksson ya England national team coach mapa abenba mezüngbuba bendanger coach liasü.

2001küm nungi tenzükba pa England team coach mapa minyak tsüngda, Eriksson ya ajaki jangja aliba coach tajung ka liasü, shibai 1980s aser 1990s tepeyong Sweden, Portugal, aser Italy nung club tem takok dangi ania liasü.

Taküm küm tetenzüklen pai pa dak terminal pancreatic

cancer putetba metetdakja liasü.

Eriksson indang agent Bo Gustavsson-i, nüngtugu manager ya Hombarnü anepdang süogo, ta Reuters nem osang agüja liasü.

England manager mapa bener aliba mapang Eriksson lenisüba nung England team-i 2002 aser 2006 World Cup nung quarter finals tonga asaya aser iba den 2004 European Championship nunga quarter final tonga asaya liasü.

Pa coach inyakba mapang David Beckham, Paul Scholes, Frank Lampard, Wayne Rooney aser Steven Gerrard nunger amala sempet tajung aketba asayartem den inyakogo.

BILEMDANGANG

“Nü mapa agi tangar ajungmesora tali inyakang.”